

關中金石文字存逸考

關中金石文字存逸攷卷十

揚州甘泉毛鳳枝撰

鳳翔府

秦

萬歲冢當瓦

篆書

未詳所在

秦漢瓦當文字云此瓦余太學得於鳳翔文曰  
萬歲冢當書法輒美非漢人所及蓋先秦墓舍  
閒物書闕不載蔑所徵矣

唐

朝請大夫陳護墓志銘

正書

垂拱四年正月

未詳所在

全文見古誌石華

誌云葬於上時鄉而未著縣名史記封禪書云

雍旁故有吳陽武時

漢書地理志作五時

封禪書又云秦

靈公作吳陽上時祭黃帝作下時祭炎帝上時

在吳陽吳陽屬雍縣漢雍縣卽今鳳翔縣然則

此誌所出當在鳳翔境內矣又鳳翔之南有五

時原扶風之南有三時原蓋皆一脈也誌云護

春秋一百有一余輯墓誌多矣能及百歲者陳

君一人而已故表而出之焉

史記索隱秦本紀注曰時止也言神

靈之所依止也亦音市謂爲壇以祭天也

權秀岳墓誌銘

陳公甫撰正書  
長慶三年

存

全文見古誌石華續編

誌略云府君諱秀岳其先天水人也祖諱陽父  
口俊皇任丹州通化府左果毅公卽果毅之第  
二子也長慶二年閏十月十三日終於鳳翔府  
建平里之私第春秋七十有八夫人隴西李氏  
元和四年四月九日終於夫家之私第享年四  
十有七卽以長慶三年歲在癸卯口十六日合  
祔於鳳翔城南原李保村禮也嗣子公緒次子  
公素云云

此石今藏鳳翔邑紳周士甫宗釗家誌云長慶

二年閏十月案資治通鑑目錄云長慶二年閏

三月明陳明卿氏仁錫以爲是年非閏九卽閏

十閏三誤也今以誌證之長慶二年確爲閏十

月片石流傳可證千載上厯學之差孟子曰苟

求其故千歲之日至可坐而致也不信然歟

案舊唐書穆宗紀長慶二年閏十月戊子朔新

書穆宗紀未載是舊書與誌合也通鑑目錄作

閏三月未知所本 新唐書地理志丹州有府

五第二曰通天第三曰同化而此誌則各得一

字曰通化豈地志誤歟抑誌誤歟疑不能明存  
以俟攷

鄭府君夫人杜氏墓誌銘

任唐翊撰正書  
大和三年十一月

存

全文見古誌石華續編

誌略云維大唐大和三年歲次己酉十一月十  
五日夫人終於鳳翔府軍營官舍享年八十八  
以其年其月廿三日安措於天興縣三良鄉三  
良里禮也夫人京兆杜陵人

此石今藏鳳翔邑紳周士甫

宗釗

家誌云夫人

安措於天興縣三良鄉三良里案史記正義秦

本紀注引括地志云三良冢在岐州雍縣一里  
故城內雍縣卽今鳳翔縣方輿紀要引括地志云雍縣南七里有故雍城漢右扶風之  
也雍縣陝西通志引鳳翔縣志云三良冢在城南  
半里許有碑記

鳳翔縣

唐

陀羅尼經幢

正書太原郡君許氏建  
天復六年三月

未詳所在

寰宇訪碑錄云在鳳翔縣今未詳所在矣

岐山縣

唐

歐陽瑛夫人裴氏墓誌銘

白季隨纂正書  
無年月

存

全文見古誌石華續編

誌略云涇陽縣尉歐陽瑛又云天興縣邢吉原  
從先塋禮也又云歐陽族渤海郡厥先尙矣曾  
祖諱皇朝散大夫洛缺又云邢州鉅鹿縣令云  
云

此石本出鳳翔今歸岐山縣知縣灌縣胡鴻賓

大令

昇猷

僅存一角已佚大半諱爲率更兄弟

行新唐書宰相世系表云爲鞏縣令此誌朝散  
大夫下有一洛字當係洛州鞏縣令也表云諱



子名禎未載官職未知卽瑛祖父否 新唐書  
地理志鳳翔府有邵吉府此誌邵吉原當以此  
得名唐天興縣卽今鳳翔縣 文獻通攷選舉  
考唐建中元年經學優深科白季隨及第卽撰  
此誌之白季隨也

佛說施燈功德經

正書

天寶七載三月五日

存

今在岐山縣末行年月下題云朝議郎行扶風  
郡岐陽縣尉李口徵建立新唐書地理志鳳翔  
扶風郡岐山縣下注云貞觀七年析扶風岐山  
京兆之上宜置岐陽縣八年省上宜入岐山永

徽五年復置元和三年省有岐山方輿紀要云

岐陽縣故城在岐山縣東北五十里

周公祠靈泉碑

崔琪狀奏正書  
大中二年十月

存

全文見金石萃編

今在岐山縣周公廟中泉名曰潤德

寶雞縣

唐

馮貞祐妻孟氏墓誌銘

孟友直撰正書  
開元三年四月

逸

全文見金石萃編

關中金石記云此誌以乾隆己卯年出土雍州

金石記云在寶雞縣貳尹署蓋篆書唐故馮氏  
婦墓誌之銘九字此誌寶雞鄉人於土中得之  
以爲玉也攜賣於市久而無售遂棄道旁寶雞  
縣丞王君若愚好古士也取而藏之鳳枝案此  
石久逸陝中拓本有數種字迹各殊皆非原刻  
也

扶風縣

北魏

造像殘刻

正書  
無年月

未詳所在

全文未見

古銅爵書屋金石遺文云此碑在扶風縣北四十里永平寺題石多魏姓與富平造像同

隋

岐州舍利塔銘

正書  
仁壽元年十月

存

全文見隋唐石刻拾遺

扶風縣志云在縣西北五十里龍泉寺嘉慶五年出土楷法精整

唐

法門寺千佛像碑并碑陰碑側湟盤經

正書

存

今在扶風縣北二十里法門寺內有武后時字

故列於此

龍光寺舍利塔記

正書

開元二十八年七月

逸

全文未見

扶風縣志云龍光寺在縣西街唐舍利塔碑今

斷作階石矣案此石久逸

贈武部尚書楊珣碑

元宗御製并八分書  
天寶十二載二月

存

全文見扶風縣志

扶風縣志云在縣北崇正鎮北二里許珣國忠  
父也元宗溺於內嬖妄事衰崇舉國君臣如醉  
如夢再逾年而祿山之禍作矣

尉遲氏造像題名 正書

未詳所在

題字見金石萃編補遺

古銅爵書屋金石遺文云本在扶風縣後移置

縣署之雙清軒今未詳所在矣

無憂王大聖真身塔銘

張或撰揚播行書  
大曆十三年四月

存

全文見金石萃編

此碑書法頗近歐褚扶風縣志云在縣北二十

里崇正鎮法門寺卽唐迎佛骨處也其地又名

法雲寺一名無憂王寺

碑云景龍四年二月十日中宗孝和皇帝旌爲

聖朝無憂王寺題舍利塔爲大聖真身寶塔焉

又名重真寺

今崇正鎮乃明時知

縣楊瞻改名也舊有木塔四層相傳葬佛指骨明正德

二年重修隆慶中木塔崩啟其藏視之深數丈  
修製精工金碧輝煌水銀爲池泛金船其上內  
匣貯佛骨旁金袈裟尙存萬厯七年里民楊萬  
臣等重建磚塔十三級云

尊勝陀羅尼經幢

薛志容建正書  
大中十載四月

未詳所在

法門寺尊勝陀羅尼經幢

正書

無年月凡七面面七行行

六十五字

未詳所在

右二幢寰宇訪碑錄云在扶風縣今均未詳所  
在矣

大悲真言

行書

未詳所在

古銅爵書屋金石遺文云在扶風縣法門寺正

殿佛座下今未詳所在矣

秦玉重修法門寺塔廟記

薛昌序撰王仁恭正書  
天祐十九年二月

存

全文見金石萃編

天祐唐昭宗年號是時梁已篡唐惟晉王李克

用岐王李茂貞仍用唐號

茂貞本宋文通  
以功賜姓名

天祐

十九年梁主瑱龍德二年也關中金石記云或

云李茂貞封秦王在同光初天祐十九年不應

有是稱案天祐十九年卽梁亡之年明年爲後



唐莊宗同光元年豈茂貞自稱秦王莊宗因舊  
號以封之耶 金石文字記云史言茂貞奉天  
祐年號此碑之末亦書天祐十九年而篇中歷  
述前事則並以天復紀年至天復二十年止亦  
與史不合

劉源李彥鐸等重立秦王碑題名

正書

天祐二十年癸未

四月

存

今在扶風縣法門寺刻於秦王重修塔廟記碑  
側關中金石記云是年爲後唐同光元年

麟遊縣

唐

九成宮醴泉銘

魏徵撰歐陽詢正書  
貞觀六年四月

存

全文見金石萃編

雍州金石記云在麟遊縣北五里九成宮故基  
案此石已剝缺舊拓本頗不易得也間有裝潢  
本託名舊拓所缺之字多用摹本補入非真迹  
也古銅爵書屋金石遺文云碑側有符篆以硃  
拓之可以辟邪

漢書百官公卿表詹事屬官有太子率更師古  
曰掌知漏刻鐘鼓故曰率更更工衡反而率字

無音當讀本音如蟋蟀之蟀今人則有讀率爲

律音者矣案說文行部衛將衛也

此注將衛之衛本作衛段

氏本改

从行率聲

所律切

又部首率捕鳥畢也象

絲網上下其竿柄也

所律切

又巾部帥佩巾也从

巾追聲

所律切

其字與幌同

幌亦音稅

三字同音衛爲

將衛本字率帥段借字自率帥行而衛字遂隱

然率猶屬衛字省文帥則專爲同音段借矣新

唐書百官志東宮官率更寺令一人從四品上

掌宗族次序禮樂刑罰及漏刻之政余案漢時

衛士皆用踐更卒率更者卽率東宮衛士踐更

之卒也隋書百官志後齊官制率更令下注云  
掌周衛禁防漏刻鐘鼓掌周衛禁防卽有統率  
衛士之責師古注漢書但言漏刻鐘鼓似未詳  
也新唐書百官志東宮官有太子左右率府太  
子左右司禦率府太子左右清道率府太子左  
右監門率府太子左右內率府合之率更寺謂  
之東宮六率新唐書兵志云貞觀十年更號統  
軍爲折衝府天下十道置府六百三十四左右  
衛皆領六十府諸衛領五十至四十其餘以隸  
東宮六率六率者合率更而言之也唐時衛士

謂之番上其義與漢之踐更同是歐陽率更之  
率當讀本音不讀律音也 孟子盡心章羿不

爲拙射變其數率孫宣公音義陸云率法也則

讀爲律

陸名善經唐時人注孟子七卷

萬年宮銘

高宗御製并行書永徽五年五月

存

全文見金石萃編

案此碑高宗御製中多妍麗之句如云複澗澄  
陰扇炎風而變冷重巒潛暑韞夏影而翻寒又  
云岫綴霞衣點虹梁而散錦巖飛澗帶瀦石砌  
而飛珠浮涼氣於彤闈庭畱花而雪夏凝清陰

於碧沼池結鏡而冰春又云幾片斷雲縈松合  
蓋數叢幽桂插月分香暝壑棲煙籠千崖而散  
碧朝原日上輝四野而舒紅笑樹餘花低空落  
影吟風宿鳥響答雙驕銘詞云鷺驕淑氣花泛  
韶光 彤闌潛暑翠幌凝寒 柳初眉細潭深  
鏡遠 邱壑怡神林篁賞性云云所謂清詞麗  
句必爲鄰也雖徐庾四傑爲之亦不過此夏日  
盛暑讀之輒覺兩腋生清風也

萬年宮碑陰從臣題名

正書

存

題名見金石萃編

右題名從臣凡四十八人刻於萬年宮銘碑陰  
內有褚河南題名一行係真迹又上官儀題名  
一行云太子洗馬學士臣上官儀潛研堂金石  
文跋尾謂百官志無洗馬學士之名今案新唐  
書百官志翰林學士充其職者無定員自諸曹  
尚書下至校書郎皆得與選儀蓋官太子洗馬  
而充學士之員也新唐書百官志東宮官屬司  
經局洗馬二人從五品下此碑題名第一行云  
奉 敕中書門下及見從文武三品以上并學  
士并聽自書官名於碑陰原敕之意凡他官非

三品以上不得題名惟學士則不論階級蓋唐  
時學士爲天子私人其禮尤寵也 太子洗馬  
乃儀所居之官學士如今之差遣竹汀先生誤  
以爲一官宜正之

金石萃編云碑陰有左領軍將軍口仁口係薛  
仁貴題名今以石本證之臣字下係金字當係  
金仁口非薛仁貴也案通鑑仁貴是年方爲右  
領軍郎將係正五品上不得與三品以上題名  
之列攷通鑑高宗上元元年有右驍衛員外大  
將軍臨海郡公金仁問新羅人以外蕃而入宿



衛者今碑陰問字形勢尙可識卽其人矣蓋仁

問於是年方官左領軍將軍係從三品百官志左右領

軍衛將軍各扈從巡幸故得題名也

尊勝陀羅尼經幢

隋西李惠造大和七年六月十日

存

麟遊縣新志云在縣西福昌院一名天台寺題

云九成宮內飛龍隴西李惠造

汧陽縣

隋

強伏僧造像

正書左行大業三年四月

存

全文見汧陽述古編

成都李雲生大令

嘉續

訪得於汧陽

唐

贈揚州都督段行琛碑

張增正書  
大厯十四年閏五月

存

全文見金石萃編

今在汧陽縣行琛太尉秀實父

案碑云宗周

柱史垂其裔用史記老莊申韓列傳老子之子

宗封於段干事又云前漢都尉昌其業用漢書

段會宗傳爲西域都護騎都尉事又云太尉之

威懷戎落用後漢書段熲傳屢敗西羌代李咸

爲太尉事又云驃騎之光啟冀方用魏書徒河

就六眷傳段護遼假驃騎大將事此皆言段氏  
郡望所出金石萃編未載故錄之至曾門德潛  
以下則武氏授堂金石跋辨之詳矣 又案雍  
州金石記云秀實祖達父行琛及其官開府儀  
同三司御史大夫傳中未載今攷此四事均見  
舊唐書段秀實傳中朱近漪氏所據乃新唐書  
未見舊唐書故云爾也此碑稱其上代曰高門  
曾門長子曰門子皆他碑所罕見者

隴州

唐

開元寺尊勝經幢

楊淡造正書  
開元十六年

存

今在隴州字迹精整案金石諸書多謂此碑爲  
僧佛陀波利書以石本證之乃佛陀波利奉詔  
譯非書也陀羅尼幢題佛陀波利譯者十有八  
九非特此幢也詳金石萃編中後漢書襄楷傳  
立黃老浮屠之祠章懷太子賢注曰浮屠卽佛  
陀聲之轉耳謂佛也是佛陀與陀同波利卽浮屠  
波利也佛陀乃僧之通稱波利則其名也

吳嶽祠堂記

于公異撰冷朝陽正書  
興元元年十月

存

全文備錄

吳嶽祠堂記 將仕郎行太子正字馮口冷朝

陽書

唐興元元年十月十一日國之元輔鳳翔隴右

涇原四鎮北庭兼管內副元帥司徒兼中書令

西平郡王李公晟有事於吳山之祠虎暢前

驅鳥隼之旟升降林嶺不歸不呼縈雲附嵐以

屆於祠下公遂以神之口感告於座客公異

忝備賓佐管文記之任操觚染翰恭而書之初

相國涼公鎮鳳翔也常以中軍委公偉材雄名

橫軼倫伍大厯四年屬天降灾沴不雨踰時土

山方焦大水成陸封內山鎮分官禳祈命公  
禱於吳山公於是氣肅體虔桂酒瓊筵公告  
神以災沴神饗公之吉蠲明能通幽應在俄  
頃雲油雨霈霖霖優渥沃瘠膏枯公私必需既  
皂且房歲口大熟遠申報禮人咸異之由是公

心有所奉動符冥應招神戶卅人供灑掃之事  
其後杖王命提偏師救亂於蜀陞翦戎於邛  
焚曾不踰時昭弓反旆繼以叛將撓眾兩河繹  
騷公鼓行而東且討且援洹水盡敵魏橋制勝  
兵未及而趙北圍解氣有餘而清苑凱旋壁渭

川則殷若長城復 皇都則劃如破竹冥符幽  
贊於是乎在無何優 詔拜公上公極人臣之  
寵且以西門之務委焉公本之禮經山在封內  
者得崇祀典况 吳山德於我乎具以

上聞特請褒異 詔使中使孟希价持傘賜神  
錦袍金帶夫人花冠等焜耀祠宇發揚幽昧山  
鎮之秩次於方岳矣徵諸故事當開元廿八年  
詔使正議大夫內常侍竇元禮賜食致祭至天  
寶八年哥舒翰拔石堡破蕃蠻封 神爲成德  
公至德乾元之間屢有褒口口爲 天嶽王則

神之宣力有自來矣人或以公曩之感神駭於  
視聽公異以爲 吳嶽者含蓄雲雨蟠厚地而  
柱蒼旻天地之山也李公持顛定傾蘇羣生而  
戴 天子社稷之山也與夫喬嶽巨鎮均工并  
用肱嚮氣合何其口哉鐘鼓樂之苾芬薦之人  
神欣欣旣晝斯夕宜矣山之廣袤載於方志略  
而不述所述者公之感通與其年月敢學舊史  
實而無華掌書記朝散大夫殿中侍御史內供  
奉于公異奉 命爲記

金石萃編云此石在隴州西鎮吳山廟 鳳枝所



藏拓本 先大夫代理隴州時覓工所拓本也  
金石文字記云按唐書是年五月二十八日副  
元帥李晟復京師七月十三日德宗至自興元  
八月晟至鳳翔斬叛卒王斌等及涇帥田希鑑  
此則以其年之十一月祭告吳山而掌書記于  
公異爲此文也碑中所云相國涼公鎮鳳翔者  
李抱玉也 金石錄補云此記文筆之工只三  
四語盡西平偉績通鑑載公異草露布至梁州  
上覽之感涕卽其人也朝陽書道媚可愛非俗  
手所及

鳳枝

案新唐書文藝傳于公異蘇州吳

人進士擢第李晟表爲招討府掌書記朱泚平  
露布於德宗曰臣既肅清宮禁祇謁寢園鐘簴  
不移廟貌如故德宗覽之泣下曰誰爲之或以  
公異對帝咨歎一再蓋其文章以肅括擅長也  
冷朝陽金陵人登第爲薛嵩從事見全唐詩小  
傳李嘉祐有送冷朝陽及第歸江甯詩 周禮  
正西曰雍州其山鎮曰嶽山鄭康成注嶽吳嶽  
也在汧漢書地理志右扶風汧卽今隴州吳山在西  
古文以爲汧山卽禹貢導嶽及岐之嶽山也雍州山後漢書  
郡國志右扶風汧有吳嶽山本名汧郭璞曰別

名吳山周禮所謂嶽山者新唐書地理志隴州  
吳山縣有西鎮吳山祠 方輿紀要云岍山在

隴州西四十里嶽山在隴州南八十里史記封

禪書華西名山有岳山吳岳水經注吳山五峰

霞舉疊秀雲天崩巒傾倒危峰相捍國語謂之

虞山

古字吳虞通

唐六典關內道名山曰吳山亦謂

之西鎮山有五峰曰鎮西曰大賢曰靈應曰會

仙曰望輦於諸山中最爲秀異山頂有龍湫蓋

吳山與嶽山岡嶺相接或謂之一山矣其實吳

山在州西而嶽山在州南也 洪氏乾隆府廳

州縣志云吳山在隴州南周禮職方氏雍州其  
山鎮曰嶽山史記自華以西名山曰岳山吳岳  
班固云汧縣吳山古文以爲汧山禹貢導岍及  
岐卽此杜佑以下又以汧山別在州西其實一  
山也 陝西通志云胡渭禹貢錐指曰周禮雍  
州山鎮曰嶽山漢志以吳山爲雍州山是吳山  
卽嶽山也朱長孺云商周之世疑以岍爲西嶽  
故爾雅職方皆名嶽山按吳嶽班酈皆謂卽古  
岍山然封禪書言自華以西名山七曰華山薄  
山岳山岐山吳岳鴻冢瀆山而無岍山又析嶽

山與吳嶽爲二隴州志則以州西四十里之吳山爲岼山州南八十里之嶽山爲吳嶽諸說互異竊謂吳山漢志雖云在縣西而岡巒綿互延及其南與嶽山只是一山自周尊岼山曰嶽山俗又謂之吳山或又合稱吳嶽而岼山之名遂隱其實此二山者周禮總謂之嶽山禹貢總謂之岼山當以漢志爲正爾

鳳枝

案胡氏辨岼嶽

爲一山其說甚確惟云史記析嶽山吳嶽爲二其說未晰攷史記封禪書旣載岳山又載吳岳徐廣曰武功有岳山吳岳在汧是吳岳之外別

有岳山且在兩處未嘗謂武功之岳山卽汧之  
吳岳山也惟岍山與吳嶽不宜分爲二耳故辨  
之 漢書郊祀志云華以西名山七曰岳山吳

山師古曰周禮職方氏雍州其山曰嶽爾雅亦

云河西曰嶽

顏氏誤嶽爲岳  
今照經文改正

說者咸云岳卽吳

嶽山也今志有岳又有吳山則吳岳非一山之

名但未詳岳之所在耳徐廣云岳山在武功據

地理志武功但有垂山無岳山也

鳳枝

案鄭康

成注周禮謂嶽卽吳嶽在汧班氏謂汧縣吳山  
在西古文以爲汧山雍州山後漢書郡國志汧

有吳嶽山本名汧郭璞曰別名吳山周禮所謂  
嶽山者鄭注謂吳山一名虞山此碑題爲吳嶽  
祠堂記自漢以來嶽山吳嶽岍山吳山虞山本  
係一山并無疑義於吳嶽之外別出岳山之名  
實由史記封禪書岳山誤字始攷岳山之岳周  
禮爾雅皆作嶽無作岳者史記封禪書蓋用古  
文以岳爲嶽後人不察因吳嶽旣作岳遂於吳  
岳之外增一岳山以足華山以西七名山之數  
其實岳山之岳乃垂字非岳字也

錢竹汀先生  
三史拾遺曰

史記封禪書岳山注徐廣曰武功縣有大壺山  
又有岳山梁氏玉繩曰岳乃垂字之誤以形近

致譌耳地理志右扶風武功縣大壺山古文以爲終南垂山古文以爲敦物徐所見史記本是垂山今本誤作岳併注中大壺亦誤爲大壺矣案此說最確故錄於此

漢書地理

志右扶風武功大壺山古文以爲終南垂山古

文以爲敦物皆在縣東

漢武功縣在渭水之南得今郿縣地今郿縣太

白山卽漢志之大壺垂山禹貢之終南敦物矣徐廣注史記封禪書謂

武功有大壺山又有岳山卽本班志武功縣注

大壺卽大壺岳山卽垂山垂山爲禹貢敦物本

在名山之列宜載祀典故太史公錄之而班志

謂武功有垂山祠其列祀也明矣後人不省垂

山之名於是改徐廣注中垂字爲岳字并改史



記封禪書漢書郊祀志垂山皆爲岳山又誤大  
壹爲大壺以啟後人之疑其誤實由於此故詳  
辨之 又案史記夏本紀注索隱引地理志云  
太一山古文以爲終南華山古文以爲敦物皆  
在扶風武功縣東華字亦垂字之誤蓋華垂二  
字形尤相近得此一解益足明封禪書岳山當  
作垂山矣況中條導山本有太華安得又舉敦  
物之名而加於太華乎至孫淵如氏尙書今古  
文注疏禹貢注謂漢志垂山當作岳山其說亦  
舛攷說文古文垂字似物字故垂山一名敦物

此班氏之本義淵如先生欲因後人之誤說而  
改古史之眞文未可從也 禮記中庸篇載華  
嶽而不重余友嶧縣張小袁孝廉曾嘗云先輩  
釋中庸華山爲太華嶽山爲吳嶽蓋對河海而  
言也附記於此以博異聞 說文雨部霽霽小  
雨霽从雨脈聲莫獲切此碑書霽爲霽蓋誤字也  
案此碑拓本共缺十四字據隴州續志所錄  
確而可信者用小字補注於旁以便觀覽其臆  
補之字不合文義者仍缺之 新唐書百官志  
東宮官屬左春坊太子正字二人從九品上

重修大像寺記

沙門義叶行書  
會昌元年

未詳所在

全文見隋唐石刻拾遺

寰宇訪碑錄云在隴州今未詳所在矣

漢中府

褒城縣

漢

漢中太守鄱君開褒余閣道記

古隸書  
永平六年

存

全文見金石萃編

今在褒城縣石門摩崖南宋紹熙五年南鄭令  
臨淄晏袤題云此碑書法奇勁古意有餘與光

武中元二年蜀郡太守何君閣道碑

漢隸字源云在雅州

墨寶云見榮經縣榮體勢相若建武永平去西

經今屬四川雅州府漢未遠故字畫簡古嚴正觀之使人起敬此

刻秦人呼爲大開通褒余余字卽斜字

司隸校尉楊孟文石門頌

八分書建和二年十一月

存

全文見金石萃編

今在褒城縣石門摩崖水經注沔水篇云褒水又東南厯小石門門穿山通道六丈有餘刻石言漢明帝永平中司隸校尉楊厥之所開逮桓帝建和二年漢中太守同郡王升嘉厥開鑿之

功琢石頌德云云案厥本語助詞蓋言厥字孟

文也

孟文名漢見常璩華陽國志

道元誤以厥字爲名歐陽

集古錄因之今爲正定如此案此頌有咸曉

地理知世紀綱豫識難易榮名休麗諸語攷劉

向列女傳頌義小序有咸曉事理知世紀綱豫

識難易榮名必利四語實爲此頌之所本焉

案頌後題名有西成韓腹字顯公都督掾南鄭

魏整字伯玉又云伯玉卽日徙署行丞事守安

陽長攷通鑑漢紀獻帝建安十年河東太守杜

畿以衛固爲都督行丞事領功曹胡身之注云

都督掌兵丞貳太守於郡事無所不關功曹掌  
選署功勞又獻帝興平二年袁術表孫策爲殄  
寇將軍策將呂範言於策曰今將軍事業日大  
士眾日盛而綱紀猶有不整者範願暫領都督  
佐將軍部分之策曰子衡呂範字子衡既士大夫已  
有大眾立功於外豈宜復屈小職知軍中細事  
乎由此觀之都督之職在漢末原爲掾吏故有  
都督掾之稱與行丞事并列伯玉由都督掾徙  
署行丞事守安陽長是由郡吏而爲縣長也行  
丞事列都督掾之上其秩較尊故伯玉由都督

掾徙署行丞事因守安陽長蓋遷官也衛固之

爲都督行丞事領功曹其職與魏整同猶爲郡

吏之職至三國魏文帝以曹眞爲鎮西將軍假

節都督雍涼州諸軍事黃初三年復以眞爲上

軍大將軍都督中外諸軍事假節鉞均見魏志曹眞傳

於是都督得專方面其秩始尊與郡吏迥殊矣

胡身之注衛固事謂都督掌兵是誤以漢末都

督行丞事之職與曹魏都督諸軍事同其實漢

末都督僅知軍中細事如孫策所言固未能職

掌兵權也

漢西成南鄭安陽三縣均屬漢中郡西成城在今安康縣西北南鄭今爲

漢中府治安陽  
城在城固縣東

右扶風丞李寓題記

八分書  
永壽元年

存

全文備錄

右扶風丞榿爲李君諱寓字季士以永壽元年  
始解大臺口由其卑安口之處萬民懽喜行人  
蒙福君故口益州從事兩舉孝廉尙口口郎巴  
郡胸忍令換漢中成固令口宜禾都尉

今在褒城縣石門摩崖古銅爵書屋金石遺文

云嘉慶甲戌諸城王春林大令

森文

始訪得之

前人皆未箸錄

鳳枝

案此碑亦係紀述修路之



事故有萬民懽喜行人蒙福之語大臺疑係閣  
道地名李君以永壽元年解大臺口由其卑安  
之處此殆言修路之功行人得以去險就夷故  
萬民懽喜也後敘厯官所至詞甚簡古惜石理  
剝泐不能窺其全豹耳 漢書百官公卿表郡  
守秦官掌治其郡秩二千石有丞邊郡又有長  
史掌兵馬秩皆六百石後漢書百官志每郡置  
太守一人二千石丞一人郡當邊戍者丞爲長  
史李君官右扶風丞卽郡丞也 漢書地理志  
巴郡有胸忍縣後漢郡國志同前志師古注曰

胸音劬忍字無別音闕駟讀爲蠢閏非也漢胸  
忍縣晉改胸臆闕駟曰胸臆邱蚓也土地下溼  
多胸臆蟲段茂堂氏

玉裁

曰胸忍二字卽邱蚓

之轉音其說甚確余案今人呼蚓爲曲蟾亦邱

蚓二字轉音也

方輿紀要云漢胸忍城在今四川雲陽縣西四十里

又

碑云換漢中成固令漢書薛宣傳尹賞與薛恭  
換縣師古曰時令條有材不稱職者得改之案  
卽今所謂對調取其人地相宜也 又漢書地

理志敦煌郡廣至縣宜禾都尉治昆侖障

洪氏府廳

州縣志曰漢廣至城在今甘肅安西州西

後漢書西域傳明帝永平

十六年命將帥北征匈奴取伊吾盧地

章懷太子注曰

在今伊州伊吾縣方輿紀要云唐伊吾縣卽今哈密衛治

置宜禾都尉以屯

田案兩漢宜禾都尉治所地望不同前漢治廣至縣昆侖障在今安西州西與今敦煌縣爲近後漢治伊吾盧卽今哈密蓋後漢西域之地較前漢尤闊也

國朝乾隆三十八年於巴里坤設鎮西府治宜禾縣

今爲鎮西廳

猶仍東漢宜禾都尉之名蓋巴里坤之

南爲哈密相距固甚近也

石門頌云或解高

格下就平易與此碑解大臺字同義

司隸校尉楊淮表紀

八分書

熹平二年二月

存

全文見金石萃編

今在襄城縣石門摩崖隸釋云蜀中晚出楊淮

碑趙氏

一清

水經注釋引晉書云山簡與譙郡

嵇紹沛郡劉漢宏農楊淮齊名卽蜀中晚出碑

其人也案熹平爲東漢靈帝紀年此石刻於熹

平二年其時淮卒已久安得與山簡同時蓋趙

氏未見拓本僅據隸釋一語誤以東漢之楊淮

爲西晉之楊淮況淮爲孟文之孫望出槌爲不

出宏農也今爲詳正之

三國魏

盪寇將軍李苞閣道題名

八分書

景元四年十二月

逸

晉

潘宗伯等造橋格題名

八分書

秦始皇六年五月

逸

題字均見金石萃編

右題名二種同刻一石向在襄城縣石門摩崖

今逸

北魏

石門銘并西壁文

王遠正書

永平二年正月

存

全文見金石萃編

今在褒城縣石門摩崖西壁文下方近訪得賈  
哲字三德五字亦遠書也遠書若不經意而丰  
神超逸令人把翫不置在北魏碑中與山東掖  
縣雲峰山鄭文公碑相近而不拘繩墨揮灑自  
如似尤過之

金石萃編云褒城縣令倪學洙云自褒城縣西  
南凡三百餘里懸崖絕壁漢唐題字隱見叢莽  
閒連綿不絕蓋宋以前路通興元棧道俱在山  
半故漢唐遺迹最多今棧道移而漸下遂不可  
摹拓矣又韓城朝邑河東山壁上石刻亦多而

石淙與北崖

石淙在河南登封縣境

摩崖尤不可勝紀又

族弟啟昆云嘉陵江南北山壁上題字亦數百

處

嘉陵江發源陝西寶雞縣大散關東之嘉陵谷上源名故道河西南流逕鳳縣及甘肅兩

當徽縣境又南流至陝西略陽縣南會西漢水

又西南流過甯羌州境又西南流入四川廣元

縣境又南流逕昭化劍州蒼溪閬中南部蓬州

南充岳池定遠合州諸境又折而東南流至重

慶府治巴縣然此種石壁古苔雜樹斫伐爲難

北入於大江

必須長梯巨架所費不支并恐工人顛墜多傷

民力皆未能羅致也并書於此以告後之訪碑

者

鳳枝

案水經注沔水篇云旬水又東南逕旬

陽縣南縣北山有懸書崖高五十丈刻石作字

人不能上不知所道山下有石壇上有馬迹五

所名曰馬迹山旬水東南注漢謂之旬口方輿紀要

云漢旬陽縣屬漢中郡故城在今陝西旬陽縣北又引梁州記云旬陽縣治有南山其北山為

懸書崖高五十丈其東為臨崖山峰巒隱隱環於縣治東瞰漢江北連鵲嶺又唐孫

可之樵興元新路記云自郿郎今郿縣南平行二十

五里至臨溪驛扼谷口出臨溪驛百步南登

黃蜂嶺平行不能百步又步登渠渠嶺盤折而

上甚峻渠渠嶺並澗可為關道平出渠渠嶺南可罷渠渠路下渠渠嶺嶺

稍平二嶺之間凡行十里自臨溪有支路直絕

澗竝山復絕澗蛇行磧上十里合於大路秋夏此路



當下黃蜂嶺復有支路竝澗出渠渠嶺下行亂

石中

廣韻渠子入切泉出也一日水瀆也

五六里與澗西支路合

秋夏此路亦絕

由大路十里橋無定河又十里至松嶺

驛自松嶺平行三里逾二橋登八里阪下阪行

十里平如九衢又高低行五里至連雲驛自連

雲西平行二十里上五里嶺路極盤折凡行六

七里及嶺上泥深滅踝

行者多苦於此可為棧路以易之

凡泥

行十里稍稍下去又平行十里則山谷四拓原

隰平曠又五里至平川驛自平川西竝澗高下

行十里復度嶺

嶺東度澗可詣為關路平行五里出嶺西亦古道詣字疑

上下嶺凡五里復平不能一里復高低有閣路  
行七八里扼路爲關關北爲臨洮關南爲河池  
入關行十里皆閣路竝澗閣絕有大橋橋盡路  
如九衢凡行六七里至白雲驛自白雲驛西竝  
澗皆閣道上有石刻橫爲一行曰鄭淮造凡三  
字不知何等人也人多以淮爲淮字蓋視之誤又一十三里  
至芝田驛皆閣道卒高下皆碎石卒字疑自芝田  
至仙岑皆平行自仙岑南行十三里路左有崖  
壁然而高出其下殷然有聲如風怒薄水里人  
謂之鳴崖又行十五里至二十四孔道古閣名也

上巖甚奇有石刻其刻云褒中典閣主簿王容  
漢中郡道閣縣掾馬甫漢中郡北部督郵迴通  
都匠中郎將王胡典知二縣匠衛績敎蒲池石  
佐張梓等百二十人匠張羌敎褒中石佐泉疆  
等百四十人閣道敎習常民學川石等三人

作川五人凡七十字

案記中所錄石刻凡七十九其字此云七十字舉其大凡也

側則曰太康元年正月二十九日案其刻乃晉  
武平吳時蓋晉由此路耳又行十五里至青松  
驛自青松西行一二里夾路多松竹稍稍深入  
不復有平田行五六里上小雪嶺極峻折嶺東

多泥土疏而黑嶺西尤峻十里百折上下嶺凡  
十八里又高低行十里至山輝驛白山輝西高  
低行二十里上長松嶺極峻羊腸而上十里及  
嶺上復羊腸而下及嶺下又高下行十里至迴  
雪驛自迴雪驛南行三里上平樂阪阪極盤折  
上下凡十五里至福溪自福溪有路並自山下  
由大雪嶺平行五里上  
長松嶺北與山輝大路  
合蓋古所通乃坦途也又高下行十里至黃崖  
崖南極峻折上下黃崖六七里至盤雲驛西行  
復並澗行二十里卽背絕小嶺上下凡五六里  
稍平又行十里至雙溪驛自盤雲驛西有路並  
澗出白城又平行三

十里至城固又行六十里至興元亦古所通尤  
坦途也城固之要道出其縣遂略開路長開天  
嶺路也此自雙溪平行四里至天苞嶺羊腸  
注亦有疑字

而上凡十五里極峻折往往閣路至嶺上南望  
興元煙靄中也下嶺尤峻折凡三十里至文川  
驛自文川南行三十五里至靈泉驛自靈泉平  
行十五里至長柳店又行十五里至興元西平  
行三十里至褒城縣與斜谷舊路合矣今案善  
化賀善恒氏仲城畱壩廳足徵錄文徵門云諸  
葛武侯引兵所由斜谷當時棧橋閣道共五千  
數百所工亦鉅矣今攷其路斜谷在郿縣武侯

治樂城樂城今爲城固

方輿紀要云武侯所築樂城在今城固縣西十

里入卽小河口趨斜谷路計至長安捷二百數十

里客商尙多取徑於此附錄於後城固三十里

平原至許家廟二十里半險雞冠梁三十里險

石堰坪三十里半險雙溪三十里半險小河口

六十里險桅杆石梁六十里險西江口

屬西壩廳三

十里險柘栗園三十里平王家壩三十里半險

苦竹街二十里平寇家關三十里進口關

屬鳳縣

三十里平上白雲四十里半險方柴關

屬寶雞縣十

五里平虢川十五里半險杜家庄

屬岐山縣

二十里

平桃川二十里半險鶚哥嘴四十里險斜谷關

屬郿縣由關東北趨槐牙亞柏蓋屋鄠縣夷攷路二百四十里至長安共程八百八十里

唐之興元爲今之漢中孫可之所紀興元新路

卽今由城固小河口東北行出郿縣斜谷至西

安省城之捷徑也孫可之所紀路程自北而南

有白雲雙溪二驛而畱壩廳足徵錄所紀路程

自南而北亦有雙溪上白雲之號其爲一路無

疑矣又孫可之所紀由郿縣卽斜谷路至興元共程

五百零八里畱壩廳足徵錄所紀由城固至郿

縣斜谷關共程五百八十里所差亦無多也惟

此路不當驛道爲商賈取徑之所託以訪求古蹟未必通曉惟記中所載白雲驛摩崖鄭淮題字及二十四孔道晉太康元年題字皆關中古刻故與酈道元所紀旬陽縣北山懸書崖石刻詳錄如右以俟好奇博古之君子隨時採訪焉

記中所載地名有文川驛陝西通志作文川鎮在城固縣北三十五里與南鄭交界卽文川口又有長柳店陝西通志作長柳鎮一作柳林鋪在南鄭縣東南三十里水經注漢水自南鄭又東得長柳渡卽長柳店矣

## 城固縣

漢



仙人唐公房碑并碑陰 八分書篆額 存

全文見金石萃編

今在城固縣後漢書郡國志引華陽國志云褒中縣有唐公防祠是東漢褒中縣亦得今城固縣地矣

鳳縣

唐

佛頂尊勝陀羅尼經幢 嚴震撰讚并行書大曆十三年二月 未詳所在

讚見金石萃編

此幢題銜云開府儀同三司試秘書監使持節

鳳州諸軍事鳳州刺史兼御史中丞充興鳳兩  
州都團練使同山南西道節度副使上柱國口  
口縣開國侯口震敬造并撰及書其姓適當缺  
處案新舊唐書均有嚴震傳新書傳云震字遐  
聞梓州鹽亭人至德乾元中爲州長史後官鳳  
州刺史興鳳兩州團練使好興利除害建中中  
劍南黜陟使韋棫狀震治行爲山南第一乃賜  
上下考封鄖國公治鳳十四年號稱清嚴遠邇  
咨美遷山南西道節度使以傳考之此幢當爲  
嚴震所造蓋震於此時方爲興鳳兩州團練使

也其開府儀同三司兼御史中丞之銜見舊唐書本傳新唐書未載而此幢云震同山南西道節度副使兩唐書均未載得此可補其缺傳云封鄖國公此幢作口口縣開國侯蓋建幢之時尙未晉爵爲公也唐鳳州治梁泉縣卽今鳳縣以地望準之此幢當在鳳縣境內矣 又新唐書方鎮表云至德元載置山南西道防禦守捉使廣德元年升爲節度使尋降爲觀察使建中元年復升爲節度使案此幢刻於大曆十三年仍有同山南西道節度副使之銜是山南西道

復升節度當在建中元年以前表中疑有脫漏  
應從石刻爲正

沔縣

唐

諸葛武侯新廟碑

沈迥撰元錫正書  
貞元十一年二月

全文見金石萃編

今在沔縣東五里武侯祠內

鳳枝

案王象之輿

地碑目云唐孫樵題武侯碑陰文刻於此碑之  
陰曾託友人訪拓碑陰僅有宋人題名并無孫  
樵文字此碑係後人重刻已非原本矣竹垞盒

金石目錄云是碑今已改鑿甚多是此碑爲後人重刻之一證也

此碑第一行云貞元三祀時乘盛秋口口府王

左僕射馮翊嚴口嚴下一字適當缺處陝西通

志謂嚴武

武卒於永泰元年此碑刻於貞元十一年時代不合

關中金石

記以爲舒王謨謨後更名誼德宗子也安得姓

嚴金石萃編能辨其誤而不能實指其人今案

新唐書嚴震傳云震建中中遷山南西道節度

使朱泚反德宗出幸奉天時李懷光與賊連和

奉天危蹙帝欲徙蹕山南震聞馳表奉迎車駕

入駱谷

在整屋縣西南三十里

懷光以騎追襲賴山南兵

以免尋加震檢校戶部尚書馮翊郡王實封二

百戶

舊唐書本傳未載封王事

車駕將還加檢校尚書左僕

射詔改梁州爲興元府卽用震爲尹加實封二

百戶久之進同中書門下平章事貞元十五年

卒年七十六贈太保諡曰忠穆

舊唐書本傳未載賜諡事

以

唐書本傳證之此碑之馮翊嚴口卽嚴震矣蓋

與鳳縣建幢之嚴震實一人也蓋震於彼時同

節度副使此時已爲節度使封郡王矣其稱府

王者蓋以其有王爵而節度使向稱軍府震又

爲府尹故曰府王如今人稱爵閣督爵相之類  
是也震厯官所至在山南西道最久政聲素美  
而功績亦最多也又鳳縣石幢缺嚴公之姓此  
碑有姓而不知何人今證以唐書本傳兩石刻  
均得確證書罷爲之一快 韋蘇州應物集中  
有郡中對雨贈元錫兼柬楊凌五言古詩一首  
又有寄李儋元錫七言律詩一首卽書此碑之  
元錫矣

略陽縣

漢

析里橋鄮閣頌

八分書建甯五年二月

存

全文見金石萃編

今在略陽縣另有知縣申如墳重模本字甚惡  
劣原刻雖剝落而桀蕩森嚴猶見東京軌範也

唐

房使君題記

正書天寶時

朱詳所在

全文備錄

太原王

缺三人名字

仁

缺八字

書中郎守武興

郡四境山嶙峋構新亭迓佳賓曰翠峰景實真  
唐天寶房使君上錫宴刊堅珉亭之右名不泯



金石萃編云在略陽縣隋唐石刻拾遺亦載其

文銘詞三字爲句雅飭鏗鏘佳作也案方輿紀

要云漢中府略陽縣本漢武都郡之沮縣洪氏府廳

州縣志云漢沮縣城在今略陽縣東一百十里也三國漢置武興督於

此後魏置東益州治武興郡又僑置略陽縣漢天

水郡略陽道在今甘肅秦安縣東北非此略陽也唐曰興州天寶初亦

曰順政郡此記稱武興用古地名取其叶韻爾

延安府

甘泉縣

西魏

馮翊王國典祠令李和之造像銘

正書

大統間

年月泐案文當在

未詳所在

全文未見

汾陽韓子馥少尉

恩湛

碑目云此石爲陝西甘

泉縣秦氏家藏竇宇訪碑錄云仁和趙氏有拓

本今則未詳所在矣北史魏常山王遵傳後附

稱元淑有七子其一子元泉從孝武入關封馮

翊王位中書令雍州刺史遷司空此記所云馮

翊王當卽其人隋書百官志後齊王府有典

祠令西魏與後齊同時亦置此官而西魏書百

官考則未載也

鄜州

唐

寶室寺鐘銘

正書

貞觀三年

存

全文見金石萃編

今在鄜州城內鐘樓有重模本

鄜坊丹延等州節度軍前討擊使環公夫人程氏墓

誌銘

王玠撰正書  
大和八年六月

未詳所在

全文見古誌石華

誌云葬於鄜州洛交縣西北八里廟原谷之口

案唐鄜州治洛交縣卽今鄜州治也

宜君縣

十六國苻秦

廣武將軍口產碑并碑陰碑側

入分書  
建元四年

逸

全文見金石萃編額題立石山祠四字

此石本在宜君縣今未詳所在矣

武授堂氏

信

金石跋謂建元四年歷代紀元彙

考皆作戊辰碑作丙辰疑史之誤今蒲城縣鄧  
太尉祠碑苻秦建元三年立題云歲在丁卯則  
四年當作戊辰史不誤而碑誤也當從史爲正

苻秦建元四年爲東晉海西公太和三年

唐

康州司馬來慈墓志銘

正書  
開元二十年

未詳所在

全文見古誌石華續編

誌略云公諱慈字思毓南陽新野人曾祖演周  
清水縣侯祖宏隋開府儀同父表上谷郡丞公  
起家權授益松唐安二府都尉屬西戎不賓河  
右時梗乃拜公河源道鎮守副使左遷春州司  
馬後南蠻蟻聚嶺外蜂飛廣州都督奏公行康  
州事神龍三年口於府第春秋六十有九夫人

段氏襄國公之長女後夫人吳氏大將軍志之  
小女并母儀令淑婦德幽閑不終遐齡先公而  
歿開元二十年歲次壬申遷葬於坊州宜君縣  
石祠東原禮也長子斐次子璟早亡次子邱次  
子彝孽子婢女壻常令業等云云

此誌本出宜君縣今未詳所在矣誌云葬於石  
祠東原卽苻秦廣武將軍口產碑之立石山祠  
矣新唐書地理志春州康州均屬嶺南道方輿  
紀要云春州今爲陽春縣康州今爲德慶州均  
屬廣東肇慶府誌云夫人段氏襄國公長女襄

國公者段志元也新唐書地理志絳州有蓋松

府同州有唐安府隴右道鄯州鄯城縣

洪氏府廳州縣

志云唐鄯城縣屬鄯州卽今甘肅西甯府治西甯縣

有河源軍方輿紀要

云唐河源軍城在陝西西甯鎮西南蓋與積石

山相近案明西甯鎮今爲西甯府改隸甘肅

右陝西金石

階州

成縣

漢

西狹頌

八分書建甯四年六月

存

全文見金石萃編

今在成縣摩崖前列五瑞圖漢畫也篆額惠安  
西表四字極其茂美吳清卿學使於五瑞圖下  
又訪得漢人題名二行未經前人箸錄

武都太守耿勳碑

入分書  
熹平三年四月

存

全文見金石萃編

今在成縣

秦州

北周

權慶和造像記

正書

存



此石近出秦州在石佛鎮大佛寺字迹剝蝕不可句讀第一行可識者有癸酉朔三字當係紀年第二行可識者撫軍將軍大都督權慶和第三行可識者使持節車騎大將軍儀同三司大都督第四行可識者口州刺史秦州大中正以下記造像事并題名不可辨識矣案權姓爲天水大族後魏秦州天水郡皆治上邽卽今秦州治也北周有權景宣嘗爲秦州大中正見北史本傳是大中正爲權氏世官也文獻通攷云中正之名始於陳勝兩漢無聞曹魏始於州郡置

中正晉宣帝加置大中正故有大小中正其用人甚重後魏北齊州郡皆有此官至隋僅有州都而無中正是大中正之官至隋已省而此石有之必在隋以前矣觀其字迹似北周人書故列於北周時

唐

姜謩墓誌銘

八分書  
貞觀六年十月

逸

全文備錄

公諱謩字孝忠秦州上邽人也江水導其源流  
泰嶽標其峻極開封疆於四履轉征伐於五侯

允祚丕承英賢相嗣詳諸舊史可略而言曾祖  
圖遠韻高情松貞桂馥祖正魏南秦州刺史冠  
軍縣公父景武康洮汶四州刺史廿四開府梁  
岷二州總管賜姓宇文氏諡忠莊公并車旗文  
物尊重於當世風烈徽猷照燭於圖篆公門承  
世祿家藉慶餘清明在躬珪璋自潤造次必於  
仁孝顛沛必於忠厚學宗邱墳貫幽蹟之宏致  
行苞文質履中庸之至道詞華綺縠術妙韜鈴  
迴瀾萬頃崇墉百仞起家左侍上士隋文受禪  
授秦王右府司兵遷長史東閣祭酒除博州新

平縣令四民仰化三欺自屏抑揚卓魯斟酌韋  
弦病免久之除并州晉陽縣長仍屬隋政不綱  
生靈塗炭羣后有瞻烏之望天下成逐鹿之情  
太上皇愍民橫流大庇交喪電照雷息濡足援  
手公投袂麾下贊揚興運謀若轉規辯同河鶴  
卽授正議大夫大將軍府功曹參軍事尋授右  
光祿大夫又進位左光祿大夫仍授委蒲津監  
度兵馬京城清定遷光祿大夫轉相國府冑曹  
參軍事公以嘉祥紹至鐘石變音請從神宗之  
典屢上繁昌之奏以功封長道縣開國公食邑

一千戶爲隴右道安撫大使俄奉別旨被追還  
京授員外散騎常侍河東道招撫大使公綏安  
初附獎勵邊城窮民旣知所歸鄰境於焉日蹙  
暨乎妖孽咸蕩文軌大同懷佐時之略當惟良  
之寄拜持節秦州諸軍事秦州刺史轉隴州刺  
史公塞帷望境建旗求瘼敦崇學校勸勉農桑  
追善政於前良革澆風於薄俗突厥來寇授公  
左七總管尋而犬羊奔北有詔追公入朝惟帝  
念功方申後命輔仁多昧福善則虛枕席彌留  
祈禱愆應藏舟不遠逝川不歸百年之壽未窮

千月之期溘盡以貞觀元年八月六日薨於京  
第春秋七十王人弔祭諡曰安公禮也夫人同  
郡趙氏封廬江郡君昆陽公懿之女也爰以盛  
門作嬪公族禮均秦晉和猶琴瑟母師之德空  
畱於昭範偕老之期俄歸於同穴以四年八月  
十三日薨於京第春秋六十粵以六年十月十  
日合葬於秦州東南宕池谷乃爲銘曰惟公命  
世含章挺生壇宇高整鑑燭融明平臺碣館曳  
組飛纓化行兩邑實垂德聲巖巖極天泱泱表  
海英靈可嗣慶祉攸在文武相襲隨和競彩爰

逮莊公鬱爲時宰炎精落紐黃神應籙大壑縱  
鱗高衢騁足分符乘傳懷金鳴玉隙駟不留小  
年俄促亦有貞淑嬪容迴暎志性柔良風儀韶  
令絲枲兼美眞草惟命兩劍終同孤鸞絕鏡言  
念返葬途遵舊鄉丹旒委鬱哀挽淒鏘泉扃一  
闕元夜何長悲涼神道松檟成行

原跋云康熙丁酉秦州人楊祖清得誌於牧豎  
之手文字炳然而塋兆已不可踪蹟矣因爲之  
卜地於淮河峪官道旁葬其誌而起冢立碣焉  
山陰萬賓耀

光遠

嘗以此誌拓本示余完好如

新小八分極得歐陽率更筆意疑卽率更所書  
欲錄其文而賓耀拓本已爲友人索去因思此  
石本出秦州西甯大臣鐵嶺李勤伯都護慎素  
有金石癖因請其代訪此石後得秦州余二田  
刺史澤春復書云此石久逸爰錄州志中所載

全文由都護轉寄余因錄入是編俾原石雖逸  
而其文可傳也惟石刻一經傳寫卽有譌舛此  
本譌字甚多確知其誤者卽爲改正餘則悉仍  
舊貫不敢臆定案新舊唐書姜謩均有傳舊唐  
書本傳所紀世系較詳惟誌云謩祖父名正舊



唐書本傳作眞舊傳言蕃父景封建平郡公誌

中未載誌云監度兵馬傳作監督大軍濟河亦

小異也新傳云蕃安撫隴外將行請於唐公曰

公天人之望已屬宜膺圖緯光有神器蕃老矣

恐先朝露幸一見踐祚死不恨高祖嘉納舊傳同其

詞微異即誌中所云請從神宗之典用尙書受命神宗事屢

上繁昌之奏用曹丕受禪事即其事也惟兩傳載蕃勸

進語均在封長道縣公奉使之後而誌中所載

則在封公奉使以前豈史誤耶誌又云蕃爲隴

州刺史突厥來寇授左七總管俄而犬羊奔北

有詔追公入朝兩傳均未載此事但云謚守隴  
州以老疾去職此誌與史異者其餘兩傳官爵  
事迹多與誌合惟誌云謚字孝忠及爲河東招  
撫使兩傳未載得此可補其缺而兩傳云謚卒  
贈岷州都督誌亦未載也 此誌書法旣工文  
詞亦典雅當出瀛洲諸公手惜石中未載其名  
耳 北周書列傳第八後云八柱國所督十二  
大將軍各統開府一人每一開府領一軍兵是  
爲二十四軍誌云謚父景爲廿四開府卽其職  
也又墓於隋朝爲秦王右府司兵長史東閣祭

酒秦王名俊文帝子隋書百官志親王屬官有  
長史東西閣祭酒各一人又有兵曹參軍事卽  
右府司兵之職誌又言驩爲左七總管案新唐  
書劉宏基傳有左一總管程知節傳有左一馬  
軍總管蓋唐初統軍官名也 誌云懷佐時之  
略當惟良之寄案漢書循吏傳序宣帝常稱因  
庶民安其田里而無歎息愁恨之心者政平訟  
理也與我共此者其唯良二千石乎古字唯惟  
通惟良二字本此蓋歇後語也論語微管仲六  
朝文專用微管二字截去仲字如功參微管之

句亦此類也

秦安縣

北周

建崇寺造像記

王湛正書  
建德三年

存

全文見金石萃編補遺

此石近出秦安縣記云佛弟子本姓呂蒙太祖  
賜姓帛文建崇可爲姓氏家言之一助碑額有  
建崇寺三字故題爲建崇寺造像記帛文建崇  
疑四字姓也太祖卽宇文泰北周孝閔帝受禪  
追尊爲文王廟曰太祖明帝武成元年追尊爲

文皇帝

西甯府

碾伯縣

唐

隴右節度使陰公修硤路記

正書

開元二十二年六月存

全文備錄

開元二十二年六月卅日奉節度使兼中丞陰  
公處分令臨洮軍副使郭質押成州健兒修此  
峽路并通車馬無口畱滯應時修了

古題記五十一字缺一字鐵嶺李勤伯都護

慎

建節湟中訪得此石於碾伯縣拓以寄余余適  
修是書因亟錄之案記中未列陰公之名兩唐  
書亦無陰公本傳惟張曲江文集有敕隴右節  
度使陰承本書一通首云敕隴右節度使陰承  
本末云卿及將士并平安好云云攷新唐書宰  
相表云開元二十一年張九齡爲中書侍郎同  
中書門下平章事二十二年張九齡爲中書令  
陰公修路記刻於二十二年曲江爲相時正陰  
公節度隴右時則記中所謂陰公其爲承本無  
疑矣唐時邊鎮敕書皆宰相執筆而詞句委曲

婉轉誥誡殷勤所以勵將帥而慰士卒者無微不至而廟謨部署亦在其中固綏邊馭將之微權也又攷唐書方鎮表開元五年置隴右節度治鄯州尋置臨洮軍於城內案唐鄯州治湟水縣卽今碾伯縣此碑出於碾伯正在隴右節度治所矣又攷方輿紀要云峽口山在西甯衛東南地極險阻爲湟鄯往來要地漢時謂之湟陁趙充國屯田奏治湟陁以西道橋七十所令可至鮮水左右是也

鮮水卽今青海

唐人嘗修閣道於此

案方輿紀要所云當卽指陰公修路之事也此

碑文字均屬平平因其與史事關涉且邊城古  
刻不易得故詳攷如右以備湟中掌故云

安西州

敦煌縣

唐

沙州千佛洞李氏再修功德記

乾甯元年歲在甲寅

十月

未詳所在

全文見敦煌縣志

敦煌縣志云在城南四十里千佛洞一名雷音

寺篆額題云唐宗子隴西李氏再修功德記



碑內題銜有云右散騎常侍又云妻父河西隴  
右一十一州節度管内觀察處置押蕃落營田  
度支等使金紫光祿大夫特進食邑二千戶實  
封三百戶賜紫金魚袋缺南陽張公諱義潮云  
云案唐沙州隸隴右道乾元後沒於吐蕃宣宗  
大中五年義潮以州歸朝置歸義軍授之事見通鑑  
卽此碑之張義潮矣碑又云乃從別敕授涼州  
司馬檢校國子祭酒兼御史中丞賜紫金魚袋  
又云亡叔僧妙弁名達戎王贊普追召特畱在  
內再假監壇又云亡妣汜氏太夫人又云故府

君贈右散騎常侍又云亡兄河西節度衙推兼  
監察御史明達又云兄明德任沙州錄事參軍  
兄明詮敦煌處士又云夫人南陽郡君張氏卽  
河西萬戶侯太保張公第十四女又云長男使  
持節沙州刺史兼節度副使檢校右散騎常侍  
御史大夫上柱國宏願次男使持節瓜州刺史  
墨離軍押蕃落等使兼御史大夫宏定次男使  
持節甘州刺史兼御史中丞上柱國宏諫次男  
朝議郎前守左神武軍長史兼侍御史宏益此  
皆銜名之可見者故備錄之 唐沙州敦煌郡

治敦煌縣卽今敦煌縣瓜州治晉昌縣卽今安

西州

洪氏府廳州縣志云唐晉昌城在今安西州東

新唐書地理志云

瓜州西北千里有墨離軍方輿紀要云杜氏曰

墨離軍在瓜州西北千里本月氏地唐置墨離

軍屬河西節度天寶五載王忠嗣討吐蕃於墨

離軍獲其全部而還又方輿紀要歷代州域形

勢云唐河西節度治涼州景雲元年置統涼甘

肅伊西瓜沙七州廣德初吐蕃陷涼州大歷初

河西軍鎮移治沙州貞元中又爲吐蕃所陷大

中五年吐蕃衰亂沙州人張義潮結眾逐其州

將遂攝州事奉表來降授沙州防禦使既而義  
潮發兵略定其旁瓜伊西甘肅蘭鄯河岷廓十  
州奉圖籍歸唐於是盡復河湟地改置歸義節  
度使以授之咸通四年義潮又復涼州

鳳枝

案

涼州之役在後十一州之役在前此碑所云隴

右一十一州卽沙州及瓜伊西甘肅蘭鄯河岷

廓十一州矣

唐瓜沙二州治所已見前今攷伊州伊吾郡治伊吾縣卽今哈密肅

州酒泉郡治酒泉縣

卽今肅州鄯州西平郡治

湟水縣卽今碾伯縣

甘肅張掖郡治張掖縣卽

今張掖縣河州安昌郡

治抱罕縣卽今河州西

州交河郡治前庭縣

故城在今新疆吐魯番城

東蘭州金城郡治五泉縣

卽今皋蘭縣岷州和

政郡治溢樂縣卽今岷州

鄯州富塞郡治廣威

縣方輿紀要云唐廣威城在陝西西甯鎮南一百八十里案西甯鎮今爲甘肅西甯府治西甯縣

此碑未見拓本文載敦煌縣志志爲武威曾思菴先生所撰先生諱誠字元魯亦號思菴道光壬午科陝西舉人與先大夫鄉試同年其跋此碑也有云再修功德玩其文義蓋李氏之先曾於千佛巖建寺李君之父贈右散騎常侍者重爲整理後李君之夫人南陽郡君又於巖窟繪畫佛像故云再修因作此記備載李氏官閥及修寺梗概刻石置洞中今寺已久湮而洞中

圖畫極工以不見風日金碧粉墨之色至今不變與此碑同爲塞外舊觀鳳枝案此志修於道光辛卯年距今五十餘年爲時尙近今新疆已爲郡縣敦煌與內地無殊官斯土者倘有嗜古好文之士公餘之暇加意訪求似尙不難蹤蹟也

鎮西廳 一名巴里坤

漢

敦煌太守裴岑紀功碑

古隸書

永和二年八月

存

全文見金石萃編

今在甘肅鎮西廳一名巴里坤城其地有巴爾庫爾泊卽漢之蒲類海也巴里蒲類一音之轉碑云立海祠以表萬世卽指蒲類海而言或作德祠非

沙南侯獲碑

古隸書  
永和五年六月

存

徐惺伯氏

松

西域水道記云此石在甘肅巴里

坤煥彩溝路側案此石剝落太甚第一行可識者惟漢永和五年六月十五日伊共十二字第  
二行可識者馬雲中沙南侯獲字共八字餘均  
不可識矣或謂沙南侯爲爵名獲爲人名者非

蓋侯獲乃沙南人也漢書地理志沙南縣屬雲  
中郡後漢郡志同案沙南故城在今山西歸綏道所  
轄托克托廳西

唐

左屯衛將軍姜行本紀功碑并碑側

司馬太真撰正書貞觀十四

年六月

存

全文見金石萃編

今在甘肅鎮西廳松樹塘行本本名確以字行  
姜薺子也新舊唐書皆有傳附薺傳後兩傳皆  
云高昌之役行本以左屯衛將軍爲行軍副總



管出伊州距柳谷百里其處有漢班超紀功碑  
行本磨去古刻更刊頌陳國威靈遂與侯君集  
進平高昌云云余案史萬歲仆武侯之碑行本  
磨仲升之碣無非取勝前人豈知後人功業文  
字絕不能勝前人耶况班氏一門文學實爲兩  
漢之冠此碑文字當不讓燕然山銘如至今尙  
存豈非塞外鉅觀文林至寶竟爲行本所鑿惜  
哉此碑形製上銳下方碑額之  
右穿形尙在其爲漢刻無疑又案行本傳云  
出伊州距柳谷百里有漢班超紀功碑今案行  
本所刻碑卽班超紀功舊石在巴里坤境則柳

谷亦當在巴里坤境矣元和郡縣志云柔遠縣柳谷水有東西二源出縣東北天山南流十五里合流方輿紀要云唐伊州柔遠縣故城在哈密衛東哈密與巴里坤相近行本傳所謂柳谷卽元和志之柳谷也若新唐書地理志交河縣之柳谷方輿紀要云在吐魯番北二百三十里距巴里坤太遠當另係一地非行本刻碑之柳谷也

迪化府 一名烏魯木齊

迪化縣

唐

葬舍利文

正書

未詳所在

濟木薩殘碑

正書

未詳所在

右二種全文均未見寰宇訪碑錄云在甘肅迪

化州

今升爲府隸  
新疆布政司

今均未詳所在矣濟木薩者

迪化府所屬阜康縣縣丞分防之所也

右甘肅碑碣

附錄古碑八種

北周

邑子一百廿八人造像記

正書  
天和元年

全文見金石萃編補遺

碑云堯山之鄉壙川之裏堯山在今蒲城縣北  
二十里此石當在其地但未能實指其處耳碑  
內題名多姓昨和者蓋羌姓也

僧緒造像

正書

天和二年

陳歲造像

正書

天和六年

全文均見金石萃編補遺

陳歲造像有二一爲陰文大字一爲陽文小字

邑子賞仲茂八十人等造像記

正書

建德元年

全文見金石萃編補遺

碑云南臨白水北背馬蘭東挾洛水西望堯山  
案白水在今白水縣南馬蘭山在同官縣東北  
五十里洛水在白水宜君二縣之東堯山在蒲  
城縣北二十里此石亦疑在蒲城境內但未能  
實指其處耳題名多賞姓蓋羌姓也賞丁浪切  
讀當去聲

三原縣令張永達造像

正書  
無年月

唐

陀羅尼經幢

沙門惟嵩行書  
貞元七年

沙門惟嵩卽書大福和上碑者

碑在  
藍田

陀羅尼經幢

沙門後素撰序正書  
咸通十二年閏八月僅存尺許

陀羅尼經幢

爲賈氏小娘子建蘇起行書  
乾符五年五月

右石刻八種均係關中古刻未詳所在附記於  
此以俟考焉

關中金石文字存逸考卷十